

東
華
續
錄

東華續錄

咸豐九

臣王先謙敬編

臣陶潛宣恭校

五月丁亥朔諭內閣常大澣覆奏清理種山棚民情形並將籌辦章程開單呈覽一摺浙省棚民開山過多以致沙淤土壅有礙水道田廬亟應查禁惟據稱浮居未定者尙易驅逐年久難遷者亦須安插編查自當分別去留俾匪徒無可潛蹤居戶亦知奉法著照該撫所議章程各條督飭地方官實力奉行不使徇於積習其有玩違不遵者隨時懲儆錮弊不難漸除至浙西水利餘杭縣南湖驟難濬復先議開支河修石牐以資蓄洩上游治而下游之患亦可稍平浙東則紹興之三江閘口外沙停水阻之處旣據籌挑鄞縣象山等縣河溪已經興辦著與各屬一體認真疏導俾川隴

修而水不爲災東南民氣日臻恬豫切勿徒託空言也○申諭奕興等整頓盛京捕務○戊子諭內閣周天爵烏蘭泰向榮奏賊眾竄逸一摺逆匪蟻聚武宣據前奏稱四面圍困將羣匪偪入羅淥洞賊巢卽可殲滅何以相持日久仍復任賊竄逸流入象州統兵大員調度乖方咎無可諉周天爵著革去總督銜無庸暫署欽差大臣辦理軍務卽回省暫署巡撫事務向榮奏定三均著拔去花翎與周天爵一併交部議處此次賊匪竄逸咎在主將不和以致將弁觀望朕姑示薄懲責令戴罪自贖烏蘭泰初抵廣西軍營著與向榮督同各鎮將分剿合擊相機籌辦賽尙阿指日到粵統制有人各處續調官兵次第雲集蠢茲羣醜諒可迅就蕩平也○周天爵向榮烏蘭泰奏三月十七日因貴州鎮總兵秦定三列營在北屬進營大林以堵賊北竄象州之路而秦定三力任防堵不肯

移營自二月至三月賊屢瞰大小林之路亦屢被擒獲四月初十
前後連日大雨臣天爵遣人密入賊營探得此數日賊必北走東
嶺由落梅走東鄉大林小林趨象州之廟旺飛飭秦定三於大林
小林倍加防堵秦定三未發一兵十六日早據報夜間望見大林
一帶燈火賊已竄去臣等派練勇及貴州兵紮營大林力截北竄
之路秦定三夜間並不接應遲至辰時尙未出兵追剿臣天爵速
到黔營秦定三始帶兵一千北追又屬貴州平遠協副將周鳳岐
出兵接應周鳳岐固執不肯適據探報十六日臣等先遣之劉季
三等勇隊至官橋塘與賊接仗賊無心戀戰當卽追殺秦定三帶
兵三千餘人悉至踊躍轟擊戰方得手秦定三因兵飢渴帶兵折
回大眾隨之南走經臣等嚴飭始離營再追賊已全至廟旺都司
常啟雲不聽將令一味阿附秦定三一同退回應請旨將秦定三

周鳳岐先行治罪常啟雲革職拏問楚兵時歷三月並無一戰亦屬玩視湖南靖州協副將博春湖南永綏協副將和春請旨革職仍畱軍營效力贖罪臣烏蘭泰到營未久所有督兵無能不能使將士知畏併心一力皆由臣天爵臣榮之咎並請交部嚴加議處不得置身事外仍在軍營效力周天爵又奏提臣向榮本有才氣膽略因曲徇其子向繼雄楚兵迄不用命乃不自責而反訛詈兵練致失人心又不聽固守之言竟致債事可否飭派湖南提督余萬清帶兵勇三千來粵督剿上諭軍機大臣等據周天爵等奏追堵不力致賊竄逸請將鎮將治罪並自請嚴議一摺覽奏實深憤懣前據周天爵等奏稱武宣逆匪經兵勇分路堵截漸形窘迫一俟續調兵到即可一鼓殲擒朕卽恐其鋌而走險諭勿遷延貽誤坐失事機以爲周天爵向榮身歷行閒必能相機籌辦乃至賊

匪大股潰圍而出僅以參劾鎮將自請嚴議而於堵截迎剿見在辦理情形全未陳明該鎮將等不受節制懦怯逗遛致令武宣東鄉逆匪兩夜一日全行竄出本應一律治罪姑念剿辦正當喫緊之時均令戴罪自效若再不知感知懼臨陣不前軍法具在不能姑容矣周天爵回桂林省城後所有地方事宜卽著與藩臬各員悉心熟籌妥辦勞崇光是否仍應分駐梧州朕亦不爲遙制見在武宣逃竄之逆匪卽責成烏蘭泰向榮督同該鎮將等同心協力急圖進剿以贖前愆儻再有遲延貽誤定當從重治罪再賊匪突圍而出竄至象州地方究竟意欲何圖東鄉賊巢是否平毀桂林平樂一帶如何防堵象州地方有無險要可守扼其奔竄之處務卽詳細具奏以慰懸念向榮非不能辦賊之人秦定三亦素勇往何以坐擁重兵任賊遠颺周天爵見已專辦巡撫事務汝等剿捕

之責更無可推諉朕非不能執法之主也將此由五百里諭知周
天爵烏蘭泰向榮並諭令勞崇光知之○論本日據周天爵等奏
鎮將不受節制致賊竄逸等語周天爵勇於任事而不能用人不
但失秦定三之心亦不能與向榮和衷辦事覽其陳奏概行參劾
並無拊循激勵之方賽尙阿到粵尙需時曰此時若照周天爵所
奏全予罷斥治罪此數十日中軍務延誤將誰責乎賽尙阿接奉
此旨一面迅速馳赴廣西一面豫籌剿辦事宜飛行烏蘭泰向榮
秦定三相機堵剿朕已諭知烏蘭泰務將不和情形密查覆奏並
令隨時知照該大臣矣賽尙阿到粵仍卽詳查確訪主帥不善馭
眾及將領不遵調度之處據實參奏慎之密之賽尙阿如有何豫
籌方略亦可隨時密陳所有周天爵等摺片及諭旨一道字寄三
道又徐廣縉摺一件片一件均著鈔給閱看將此由五百里諭令

知之○諭本日據周天爵烏蘭泰向榮具奏鎮將不受節制又據周天爵單銜片奏向榮曲徇其子向繼雄軍不用命等語湖南副將博春和春統帶楚兵何以時歷三月並無一戰向榮屢著戰功何以周天爵參其曲徇伊子致失人心詳閱陳奏各情皆因統兵大員不和以致觀望貽誤周天爵忠直素著向榮奮勇爭先人所共知而近日徐廣縉亦有參該提督諉卸觀望之奏是否實情奏定三之心地朕未深悉烏蘭泰甫到軍營無所用其回護其所以不和實在情形自己訪察周知是否係周天爵不善馭眾致失兵心抑係向榮奏定三等各有徇私觀望之處著卽查明據實密陳毋稍隱飾並將見查各情於具奏後一面迅速知照賽尙阿可也賽尙阿未到以前烏蘭泰必能仰體朕意調和諸將使之盡釋前嫌共圖決勝烏蘭泰朕素知其沈毅諒必不負委任況係密旨交

查之件尤不可洩漏勉之慎之將此由五百里密諭知之○諭本日據周天爵等奏粵匪北竄象州速籌防剿等語見在武宣賊勢潰散恐由修仁荔浦等處窺伺桂林該提督余萬清見已駐兵江華防堵著卽確探賊蹤不可令與賀縣賊匪合股其桂林一路扼要地方如有可以應援之處卽速前往協同堵剿勿失機宜將此由五百里諭令知之○己丑修福建水師各營戰船○蠲免浙江積年民欠銀米暨道光二十九年分漕賦○庚寅諭軍機大臣等周天爵奏緝查保甲完竣並將採取保甲說開單呈覽一摺保甲爲除盜安良之善法該署撫刊有保甲章程以除暴爲急務自不至文飾塞責惟保甲行於無事之時團練行於有事之日見當粵匪未靖保甲釐奸團練禦侮防守之道兩皆緊要著周天爵鄒鳴鶴督飭所屬實力辦理俾宵小無自潛蹤閭閻得以安堵儻奉行

不力仍復視爲具文如所稱賊黨勝而善類衰封疆大吏將何以辭其責也將此各諭令知之○免西藏換防官兵原借治裝銀○癸巳諭內閣周天爵向榮奏遵旨審明堵禦不力之將備請嚴行懲辦一摺廣西已革潯州協副將李殿元署提標遊擊事都司宋煜署柳州城守營都司事守備陶玉德前因防堵要隘任賊衝突經李星沅等參奏降旨革職拏問茲據周天爵等審明定擬具奏雖訊無遇賊逃避情事惟當賊匪擁至之時旣不能奮勇擊賊又不能極力堵禦實屬怯懦溺職李殿元宋煜陶玉德均著發往新疆效力贖罪以示懲儆○諭周天爵奏據控查參潯州府等官請分別革職拏問一摺廣西武宣縣生員王作新前經呈控馮雲山等在桂平習教結盟一案已革潯州府知府顧元凱丁憂桂平縣知縣王烈事前旣毫無覺察迨經控告到案又不赴鄉親查嚴行

究辦江口司巡檢調補廣東省巡檢王基專司緝捕乃旣疏於查拏又復任聽賄屬吏治廢弛至此已極必應徹底根究王烈王基均著革職同已革知府顧元凱一併拏問交鄒鳴鶴提同府縣幕友人等嚴訊確情按律懲辦○諭周天爵勞崇光奏請將性耽安逸聲名狼藉之署參將革職拏問等語廣西署鬱林營參將桂林遊擊吉祥當賊匪竄擾該州從未出城剿捕迫會匪凌十八等圍攻州城月餘該員不能極力守禦又不能出城夾擊實屬昏懦溺職吉祥著革職拏問交鄒鳴鶴嚴審究辦以肅軍令○諭軍機大臣等據大學士卓秉恬奏請仿堅壁清野之法以平盜賊撫難民一摺並將原任知府龔景瀚所著議三篇鈔錄進呈覽其所議於此時事勢頗多可採之處著鈔給賽尙阿閱看並行知鄒鳴鶴察看地方情形妥爲籌辦並知照廣東督撫一體酌行又據新選桂

平梧鬱道許祥光面奏接到家信聞廣西賊匪有窺伺糧臺之意
並看守糧臺不宜專用募勇等語行軍以轉餉爲先務軍餉所儲
積重在糧臺經理固貴得人保衛尤須嚴密安設糧臺之處當審
地形可守者選派弁兵謹慎巡防始可有備無患其地宜分置而
不宜合儲使供給易周而轉輸亦便其守護之處更宜慎派弁兵
嚴密稽察勿稍輕忽前已降旨疊飭軍營在事大員茲特再寄該
大臣先事豫籌並卽行知鄒鳴鶴督率糧臺各員加意慎重爲要
將此由五百里諭令知之○甲午諭內閣周天爵勞崇光向榮奏
兵壯剿滅西林縣股匪並追剿博白縣股匪大獲勝仗一摺據稱
該匪陳三等竄往西林縣陽萬淶冲地方經百色廳同知孫蒙督
率兵練將首匪陳三麥亞富用礮轟斃其逃逸者旋被泗城府圍
練殺盡又稱劉八等由陸川竄回博白經知縣游長齡前任黎平

府知府朱德璣督飭壯練擊賊屢挫其鋒並諭示脅從解散者幾
二千人四月初十日賊目黃錦泗馮子材等九百五十人復請投
誠自贖該員等擇留精銳隨同打仗劉八聞風潛逃該府縣等追
殺至馬尾嶺殲斃賊將軍余四並賊先鋒十二人賊匪三百五十
六人墮崖落澗者甚眾見在乘勝追入廣東合浦境內勢已窮蹙
著廣東交界處所文武各員卽速合剿以淨根株百色廳同知孫
蒙著先行交部議敘西林博白出力之官紳壯練查明酌保候朕
施恩賊匪到處擄掠良民被其裹脅此次經博白等縣出示曉諭
棄械來投者不下二千人可見流離轉徙陷於賊中者不知凡幾
大兵一到向化同心皆吾赤子卽如黃錦泗馮子材等亦知悔罪
投誠殺賊自效如果始終出力不難與張釗等同寬既往悉予自
新統兵大員務當仰體朕心翦滅兇頑保衛良善勿使吾民久困

鋒鏑也○諭軍機大臣等周天爵烏蘭泰向榮奏賊匪見在竄踞情形繪圖呈覽並參堵禦不力之鎮將一摺東鄉逃竄之賊據探見踞象州之百丈新寨中平等村皆是苦鄉勢難久踞難保不窺伺省垣所有三處入省之路已經飭委文武分帶兵勇扼要堵塞周天爵見計已回省城辦理防堵事宜仍當於近省各縣險要處所層層設防勿令北竄其四排七排八排等處民多富足斷不可任賊擾掠致齎盜糧其與猺民毗連地勢絕險尤當擇要嚴防勿致蔓延勾結賊匪逃出東鄉之後該處賊巢正可乘機平毀撫卹難民此事最關緊要何以摺內總未議及廬望實深見在東鄉羅淥洞等處賊巢是否賊匪全數逃去抑尚有賊占踞著烏蘭泰向榮迅卽分飭文武員弁併力搜緝以杜竄匪歸巢之路所請暫畱革職之楚黔兩省領兵將官未免太無區別此次署貴州古州鎮

總兵李瑞等據稱接仗尙勇失於籌畫著與前次追堵不力之鎮將周鳳岐等一併責令戴罪自贖該鎮將等果能激發天良奮勇堵剿權衡功罪尙可量從末減儻仍不知感知懼致誤事機斷不能再爲寬宥也烏蘭泰向榮專辦剿捕責無旁貸賊匪見當奔竄未定之時較之東鄉等處更易得手正可督率將士紳勇合力堵剿勿使再有竄逸其賀縣一帶剿辦情形若何卽隨時奏聞以慰廬注將此由五百里各諭令知之○乙未諭軍機大臣等前據徐廣縉等奏南海東莞兩縣因公項命案之嫌聲言罷考請分別停其考試已降旨飭令暫爲停考查明懲辦其被累之同學察實奏明仍卽許其考試該督等諒已確查辦理朕心殊深懸念此事一由書院公費之改移一由生員抗糧而自盡固緣一二人懷嫌聳動亦安知非有激而然其閒附和想亦無多南海一書院中與東

莞一邑生徒皆爲所累若不分晰是非明白勸懲致使良莠同科轉非所以策勵士習至義倉經費始而斷入書院既而斷還義倉何以前後兩歧東莞抗糧一案生員黎子驊何以在縣署自戕有無屈抑以致眾心不平士風刁玩固宜重懲吏治乖方亦應嚴儆著徐廣縉葉名琛體察羣情務期平允玩法者不可無所董戒被累者亦不可過事苛求卽將見在辦理情形據實具奏以慰廬念將此諭知徐廣縉葉名琛並許乃釗知之○丙申諭軍機大臣等張亮基奏滇省銅務見辦情形一摺據稱近年礦少質劣積硯愈深窩路愈遠且附近炭山砍伐殆盡工費益繁以致額銅不能依期到店往往停腳待運廠員店員均極疲累廠店交疲則運員之遲逾銅質之低潮皆所難免所奏自係目前實在情形惟地不愛寶亦賴人力相機籌辦該撫見已遴選委員設法攻採麗江東川

所管各廠或據報獲礦或覓得子廠較上年漸有起色見在京局鼓鑄需銅孔亟著吳文鎔到任後會同張亮基督率藩臬兩司嚴飭廠店各員認真經理務於循守舊章之中寓力求整頓之意即使量爲變通亦應斟酌盡善慎勿輕議紛更總之廠員須善隲引苗嚴督砂丁不得聽其以硎老山空一報塞責而店員之承運遲滯運員之沿途逗遛甚至恣意偷竊捏報遭風均應節節嚴防以杜積弊庶期於銅務漸有裨益諒吳文鎔等必能勉力籌辦不待諄諄告誡爲也將此諭令知之○丁酉 皇貴太妃四旬慈壽節

上詣

壽康宮行禮○諭內閣廣西軍務前已有旨令烏蘭泰

與向榮督率鎮將相機籌辦向榮係該省提督本有節制協鎮之責烏蘭泰係特旨派令幫辦軍務所有廣西省鎮將以下及各省徵調赴剿官弁均著一併聽其節制賽尙阿行抵軍營以後著自

巴清德達洪阿烏蘭泰向榮以次並通省文武統歸節制以肅軍

紀○烏蘭泰奏

臣

自到軍營體察賊情困久思竄勢所必然四月

十六日賊由東北竄出

臣

與署撫

臣

周天爵商議自帶提標兵二

百名廣州駐防兵二十名會同提

臣

向榮追剿十七日午時起程

聞賊在廟旺墟攻古城營盤

臣

等馳至新遠離廟旺墟約十餘里

見古城營盤被賊攻破督兵齊進至牛欄塘賊退入廟旺墟等處

因思古城敗兵回到象州城內人心必亂遂帶兵先赴象州城並

恐賊由廟旺入謁寺村掠中坪羅秀大樂等村走桐木入四排四

排北卽石牆通省城之要路東北卽入八排搖山

臣

飛致

臣

向榮

防守詎十九日探報賊竄入寺村

臣

向榮帶兵馳赴羅秀桐木一

帶迎剿

臣

催秦定三由廟旺尾追二十一日賊由寺村奔中坪百

丈

臣

到營半月襄辦無方惟有懇恩重治

臣

罪

臣

上諭烏蘭泰奏

勦辦無方請旨治罪一節賊匪由武宣東鄉竄至象州已將周天
爵向榮秦定三分別懲處矣烏蘭泰雖係幫辦軍務惟甫經抵粵
與久駐軍營者有閒著毋庸議處○諭軍機大臣等據烏蘭泰奏
賊匪竄入寺村一帶分路堵截情形並自請治罪一摺另片奏敎
練節制及鄉勇壯勇事宜各等語所論頗爲明晰此次武宣東鄉
賊匪竄至象州廟旺墟將古城營盤燒毀乃四月十七日夜間之
事如果楚兵及秦定三所帶黔兵迅速追剿與李瑞所統古城防
兵首尾夾擊何至困久垂擒之賊不能殄滅向榮秦定三所帶之
兵不能用命將弁亦不協力同心事機坐失爲主將者所司何事
見在賊又竄往寺村一帶將由中坪百丈圖入四排四排北通省
垣東北卽接八排嵯山此係最要關鍵提督向榮已馳赴桐木扼
其前路斷不可稍有疏虞任賊竄擾續調楚兵黔兵各千名俱已

到營此乃生力之兵合原駐官兵共七千餘名又隨營壯勇六千數百名兵勇之數不爲不多前奏竄逸賊匪止四千餘人卽應堵剿兼施相機兜捕惟軍無紀律兵驕將惰若不力挽積習卽徵調頻仍亦豈有濟向榮自嘉慶年間身歷戎行豈不知約束兵丁嚴申軍法坐視失事甘受重罪耶見在烏蘭泰轄帶之兵著卽如法教練楚黔各營亦宜痛除惡習整飭號令若再遇賊奔北仍蹈前轍朕惟統兵之大員是問至烏蘭泰所奏鄉勇冒稱壯勇浮領錢糧及壯勇不宜添雇並於壯勇內挑作新兵等語所論不爲無見賽尙阿計日可抵軍營新任巡撫鄒鳴鶴亦可抵任應如何分別籌辦之處汝等悉心斟酌可也再投誠賊目如張釗張國樑黃錦泗等均已殺賊立功旣肯悔罪自新卽可寬其既往其詭詐反覆之徒自不容輕率收納致貽後患惟在統兵者隨時隨地操縱得

宜亦不必豫存成見也將此由五百里各諭令知之○諭據烏蘭泰馳奏武宣賊匪竄入象州分路堵截並論軍行紀律又團練募勇各情形所言不爲無見賽尙阿計日可抵軍營著卽悉心籌度分別酌辦烏蘭泰各摺片並諭旨字寄又程裔采據咨調派鄖陽宜昌二鎮官兵赴粵奏片均著鈔給賽尙阿閱看仍知照鄒鳴鶴可也將此由五百里諭令知之○修山東運河泃河二廳隄壩○戊戌兩江總督陸建瀛奏請停止襄陽運鹽報聞○修南河江防廳屬防風埽工○己亥賽尙阿奏粵匪各股以東鄉爲最鉅若能迅速剿滅則餘匪勢如破竹五月初四日行次湖北應山縣境接閱周天爵信函所述情形實因從前視事太輕調兵太少兵不足則將帥無所施其謀練勇亦無以作其氣似惜費而費轉增鉅見在雲南所調之兵左大雄管帶一起查無消息通計前後調兵僅

及一萬五千有零查已到之兵歷屆接仗情形未能盡期得力續調未到之兵均當起程在途見飛催趨程迅速前往仍恐屆時分投調遣未能裕如請添調湖北兵二千名爲後勁 上諭軍機大臣等賽尙阿奏途次接周天爵信將原函進呈請添調湖北兵二千名一摺粵西各股匪徒如賀縣溫大貨五一股已由懷集竄回粵東距懷集三百餘里東省必能殲滅凌十八一股爲滇兵擊敗散走劉八一股經博白縣游長齡等殲擒夥黨解散暫從見追入粵東合浦界內西林一帶潘大陳三等股匪經百色廳孫蒙督率練勇殲斃首犯併餘黨剿滅殆盡其南甯府屬顏品瑤等股匪於竄回靈山後經廣東提督剿擒大半是粵西通省盜匪其勢已衰惟武宣東鄉會匪大兵屯聚相持日久仍任北竄廟旺寺村等處前奏金田匪眾萬餘見竄出四千餘人可見會匪除婦女老弱及

裏脅外人數亦不甚多總因主帥各執意見兵將解體觀望推諉以致老師糜餉曠日無功古人用兵有以多勝少者亦有以少勝多者師克在和總在統兵大員善爲調度若不能駕馭如楚黔兵將前轍兵雖多亦何濟耶賽尙阿到後事權歸一自必節制嚴明激勵將士信賞必罰力矯前此漫無紀律之惡習俾各營將弁兵丁咸奉約束而遵號令庶克殄除醜類迅奏膚功周天爵函內所指各情該大臣於沿途逐一訪察是否確實附報覆奏至所稱德亮有口才而無膽氣用之多事之鄉久必爲累等語該大臣悉心察看據實奏聞惠慶業已革職並查明西林失守何以不卽應援迅卽一併具奏周天爵原信二件均著發還將此由五百里諭令知之○賽尙阿奏請將河南把總董荆山前任浙江知縣江忠源已革湖南遊擊劉文賢帶往軍營差委允之○調湖北兵二千名

赴廣西剿賊○辛丑周天爵向榮烏蘭泰奏查逆匪竄象州東南百丈新寨中坪一帶皆傍山依險踞爲巢穴形勢雖險糧米無多勢必思竄臣等會商以桐木爲東路總彙逾桐木而抵修仁之石牆爲東路入省咽喉由羅秀而趨寨沙鹿寨運江爲西路入省咽喉是桐木羅秀最爲喫緊須重兵列營相拒以此臣榮紱營桐木據貴州威甯鎮總兵重綸等呈報二十七日賊由鼇村馬鞍山而來分七股撲營該鎮等令各營靜以待之用大礮對照賊伍迫賊偏近一然衝擊遂成血路約斃數十人該匪大駭退而復住連擊不支始行逃逸若非重綸卻敵有方貴州三鎮營盤又幾不守謹擇尤爲出力者先行開列懇恩獎勵上諭軍機大臣等此次象州賊匪分股撲營重綸等併力堵擊業已大挫賊鋒惟賊巢糧米無多勢必鋌而走險該處距省路徑紛歧且與四排等處徭峒接

連尤爲要隘匪徒詭詐多端難保不設法誘我以爲明攻暗度之計烏蘭泰向榮等務當嚴飭各路弁兵實力堵擊以防奔竄之路用兵固當鎮定不應冒進亦不可坐失事機見在賊鋒旣挫續調各兵亦陸續到營正可乘勢直搗賊巢一鼓殲擒全在統兵大員臨時決勝相機籌畫烏蘭泰向榮專辦軍務周天爵回省防守務當各盡乃心妥爲布置毋任賊匪再有竄逸龍門司巡檢馮元吉如何殉難卽將原委詳查具奏請卹將此由五百里諭令知之○諭本日據周天爵等馳奏黔兵大挫賊鋒請鼓勵出力將弁並請將救應太遲及逗遛不進各將官分別懲處又奏參署鎮安守備羅福杲等摺片已分別降旨矣周天爵所參總兵李伏沿途逗遛是否因未帶長夫州縣應付不及所致賽尙阿到軍營後查明具奏再降諭旨外省赴調之兵自雇長夫與州縣應付夫馬二者孰

爲速便亦著賽尙阿訪察情形知照鄒鳴鶴督同糧臺各員妥速斟酌辦理至調任廣西右江道嚴正基見已派辦糧臺足能籌備周妥湖北鹽道姚瑩曾任海疆著有勞績朕知其謀略素優是以飭令前赴軍營賽尙阿到後贊畫需人想該員必能隨同運籌不負委任也周天爵等摺片三件並寄發各諭旨均著鈔給賽尙阿閱看仍卽知照鄒鳴鶴可也將此由五百里諭令知之○諭步軍統領衙門奏民人馬咸齡呈遞奏章請復康熙年間混江龍鐵掃帚刷沙舊法等語著陸建瀛楊以增卽查明混江龍等法於何年裁撤從前有人條陳仍復舊制因何仍不能行歷查舊案詳細具奏黃河形勢日淤日高受病滋深自宜力籌疏通海口之策務須體察情形悉心籌度以爲久遠之計該民人所遞奏章著鈔給閱看將此諭令知之○以堵剿象州會匪獲勝賞總兵官重綸等花

翎○壬寅諭軍機大臣等有人奏粵東高州府賊氛日熾一招據稱信宜縣賊首凌十八聚眾滋事署茂名縣知縣胡宗政奉委訪拏率將凌十八之弟凌廿四縱放以致凌十八聲勢益大更聞該處東鎮墟等處有王大亞佛六等股往來茂名信宜兩境排莊挾劫擄人勒贖其尤甚者有何名科何名譽兄弟聚匪六千餘人踞住安鷺黃塘石骨墟一路焚掠至府城外之水堂鄉殺死練丁百餘並練長候選知縣李景新等復劫新崗等處離郡城僅四十里等語賊首凌十八滋擾兩粵交界地方膽敢圍攻鬱林州城猖狂已極當其初起滋事之時該處地方官如果認真捕拏痛加懲治自不難立就撲滅賊弟凌廿四前據該督撫等覆奏係據紳耆聯名具保實不爲匪安知非地方官受其挾制曲爲回護仍須確切訪查毋任奸匪漏網劣員蒙蔽見在廉州賊夥尙未盡殲而高州

之匪又復如此橫行若不併力撲滅坐令蔓延兩省忽去忽來何以靖閭閻而衛良善著徐廣縉葉名琛按照摺內所指盜匪姓名督飭文武員弁分投緝拏其凌十八劉八各股尤當會同廣西合力兜剿立淨根株高廉肇慶各屬均與廣西毗連在在均關緊要賽尙阿等卽日可到軍營大兵雲集一經痛剿勢必竄入東境見在提督陶煜文帶兵高廉而肇慶一帶賊氛未靖朕心實深懸念徐廣縉旣未便離省遠出葉名琛正值清遠撤兵回省之時著該督撫等商酌何處情形緊要或須葉名琛親往兩粵交界處所駐紮督辦卽一面啟程一面具奏總期兩省夾擊迅速掃蕩羣醜慎勿再延時日頃又據駱秉章馳奏探報廣東另有曾大生股匪欲至湖南滋擾而前由賀縣竄回廣東廣甯之匪亦未撲滅如仍向英德清遠遊竄則湖南宜章桂陽一帶又須防堵等語著徐廣縉

等迅卽查明曾大生一股是何處賊匪趕緊拏剿毋致蔓延鄰省奏摺一件著鈔給閱看將此由五百里諭令知之○諭張亮基奏滇省防堵情形一摺粵西賊匪未平誠慮流竄鄰省據稱滇黔沿邊宜講堅壁清野之法雖地雜苗夷未能一律辦理自當度其形勢備豫不虞見已於廣南府屬與西林連界之寶甯縣各隘口築堡練丁試行已有章程廣西州邱北師宗等縣與曲靖之羅平等處次第照辦自必認真督率漸收成效切不可有名無實視爲具文至土富州交界之谷臘白羊等地方有匪徒滋擾該督撫等尤應督飭文武加意巡防毋稍懈弛斷不可令廣西竄匪勾連滋蔓將此諭令知之○停止本年秋決○修廣東南海縣桑園隄工○癸卯諭內閣 壇 廟大祀理宜整肅向來有專派稽查大臣俾司巡察朕看近來未免視爲具文因循怠忽不過以站班爲當差

使殊失敬慎之道本月二十三日 方澤大祀著該大臣等於前
一日搜查後次早尤應認真稽察不准偷安其並無執事之人及
跟隨人等不得任其出入自由其 櫺星門內左近勿令閒人在
彼偷覷若稍有疏忽惟將該大臣等懲處不貸嗣後凡遇親行

大祀均應一體嚴恪將事毋稍疏懈○甲辰諭內閣朕前因琦善
勦辦雍沙番族一案與哈勒吉那所奏情形不符又屢被人參奏
各款降旨令薩迎阿馳赴西甯查辦茲據奏查明琦善勦辦黑城
撒拉回子及黃喀窪番賊尙無過當之處惟訊明雍沙番犯等供
詞並詳查番族住牧原委及被勦情形實屬率意妄殺刑求偏供
等語向來甘涼一帶時有番賊搶掠居民行旅均受其害邊疆大
吏原應隨時查拏懲辦以戢奸宄而衛善良此案若使琦善勦辦
得宜朕方嘉其才能幹濟乃據查奏所稱任性錯謬竟至於此實

屬大負委任琦善著卽革職由薩迎阿派員解送來京交刑部按照摺內所參情節嚴行查訊又薩迎阿前奏琦善上年未能禁止張燈演戲一節著刑部一併定擬具奏所有前次刑部覈擬雍沙番犯罪名摺片著仍交該部於全案覈定時另行奏明請旨辦理○諭軍機大臣等薩迎阿奏遵旨查明琦善被參各款一摺據稱琦善勦辦黑城撤拉回子及黃喀窪番賊尙非無故興師惟將雍沙番族殺斃多名實係妄加誅戮邊疆地方蒙番雜處搶掠之案層見疊出查拏懲辦固不可使有屈抑亦不可稍示寬縱薩迎阿查辦此案於該處情形操縱緩急自必確有定見琦善旣已獲咎蒙古郡王所遞訴詞業經爲之剖白薩迎阿見署總督卽將蒙古番民日久相安章程悉心酌覈奏明妥辦不可因此案琦善辦理過當轉開姑忌養奸之漸其見訊之通事千總馬圖巴總也福供

吐不實並供詞狡展之把總康潤均著革職嚴行審訊並將見經訊明之雍沙番子等如何安置之處一併妥議奏聞前交查各案亦著逐款查明分別具奏再琦善前次保奏勦辦番回出力各員雍沙之案業已錯謬自不能再邀鼓勵琦善原摺單片均著鈔給閱看其中儻有一二員於另案出力者亦卽覈實具奏毋任冒濫將此諭令知之○以薩迎阿暫署陝甘總督

由正白旗滿州都統署

○乙巳

諭內閣周天爵自上年派赴廣西辦理軍務歷次署理巡撫秉性忠直不辭勞勩朕素所嘉尚念其年近八旬久居瘴癘之鄉朕心時深眷注見在賽尚阿已將抵粵軍營事務統率有人鄒鳴鶴計日亦可抵任周天爵著於交卸巡撫篆務後卽行來京○諭軍機大臣等本日據徐廣縉奏接烏蘭泰來函確知軍營實情等語周天爵先經飭回省城暫署巡撫見計鄒鳴鶴到粵已降旨令周天

爵於卸事後卽行來京象州大營軍務責成烏蘭泰向榮二人節制管轄無所掣肘自當妥速辦理見在續調大兵節次到營兵力既厚烏蘭泰平日精於教練朕所素知卽應相機進攻分投堵截以期一鼓殲滅羣醜提督向榮初到粵西疊獲勝仗豈不能辦賊之人若云統帥牽制不能自行己意此時周天爵已令來京賽尙阿卽日行抵軍營事權歸一復何能藉詞推諉見在黔兵已挫賊鋒著卽與烏蘭泰嚴督各路鎮將並鈴束驕悍兵丁力益前愆以圖後效若再游移觀望坐失事機責有攸歸朕不能爲爾寬也至投誠賊目如張釗張國樑黃錦泗等旣已殺賊立功原可予以自新其前曾攻城戕官見聞大兵雲集窘迫詐降反覆之徒必應加意防察萬勿輕信招納致墮奸計而怠軍心賽尙阿到軍營後其各恪聽節制奮勉立功以慰朕念懷之愼之將此由五百里諭令

知之○諭徐廣縉葉名琛奏堵剿各匪疊獲勝仗並陳奏廣西軍務情形各摺片又奏高廉各屬剿捕事宜未便遽易生手一摺高廉各股匪徒見尙未經殲滅自應趁此聲威力圖兜剿以淨根株宗元醇督辦一切既能權衡應變不誤機宜著卽暫畱廣東會同在事文武合力堵剿其高州府屬安鵞嶺等處賊匪昨已有旨寄諭迅籌剿辦見據奏稱已飭總兵楊昌泗速回高郡務令趕緊撲滅勿致蔓延該省各股匪徒肅清卽著陶煜文遵照前旨前往廣西會剿宗元醇曾任廣西知府於該省情形熟悉並著該員會同陶煜文前往辦理統俟兩省軍務告竣再令宗元醇來京供職所有廣西軍餉仍著該督權其緩急通盤籌畫爲要將此由五百里諭令知之○諭據徐廣縉奏堵剿賀縣竄回股匪疊獲勝仗及高廉各屬剿辦喫緊並論廣西軍務情形各摺片已分別降旨寄諭

矣周天爵忠直有餘馭眾乏術朕恐其不得軍心該大臣到粵後或致掣肘於大局甚有關繫見已飭令來京毋庸仍留該省計鄒鳴鶴已接巡撫印務省城防堵及通省團練守禦各事卽飭鄒鳴鶴督同藩司勞崇光及新授臬司姚瑩辦理已革右江鎮總兵惠慶據徐廣縉奏稱功多過少賊匪黃大一股實係惠慶督兵擒拏斃賊甚眾是否李星沅周天爵參劾過當另有別情著卽確切查明據實覆奏周天爵已令來京軍營一切調度皆該大臣專責其在事文武各員人材不乏足供器使竊尙阿忠誠豁達朕所深知必能鎮服羣情樂爲驅策於推心置腹之中仍寓沈機默運之力庶得人任事賞罰嚴明蠢茲醜類諒可剋期蕩平也勉之望之諭旨並各摺片均著鈔給閱看將此由五百里諭令知之○命戶部尙書裕誠協辦大學士○以周祖培爲刑部尙書王植爲刑部左

侍郎蔣文慶爲安徽巡撫李本仁爲安徽布政使調張熙宇爲安

徽按察使吳鼎昌爲甘肅按察使以姚瑩爲廣西按察使

山湖北歸道還

○調裕泰爲陝甘總督以季芝昌爲閩浙總督朱鳳標爲左都御

史王慶雲爲戶部左侍郎

由詹事遷

○丁未諭內閣糧船各幫水手獷

悍性成往往尋讎鬥毆甚至戕害人命道光十四年曾欽奉

諭

旨嚴飭查辦隨時整頓屢經嚴加懲創而積習相沿暨不畏法見

據顏以燠奏鎮江後幫漕船行至棗林隔地方該幫後所水手聚

集多人與前所水手挾嫌械鬥致斃多命經官兵捕役往拏尙敢

拒捕傷人不法已極漕船行走運河督運員弁有約束水手之責

豈容任聽恃眾藐法沿途滋事著楊殿邦卽速查明失察之該管

員弁分別嚴參仍責成各省糧道嚴飭各幫押運之委員幫弁等

於所屬水手嚴加彈壓一路督押遄行不准片刻停留攔泊致生

事端並著沿途各督撫遴派文武各員分段巡查遇有水手滋事
立即嚴拏究辦此案見獲各犯著交陳慶偕親提嚴訊並緝拏逸
犯務獲歸案從重懲辦毋任一名漏網以肅漕政而儆兇頑○諭
張亮基奏遵議保甲章程及嚴拏燒香結盟匪徒一摺據奏滇省
界連川黔粵西等省各州縣村寨以外多有廠地砂丁人等五方
雜處引類招朋而臨安開化廣南永昌廣西各府州屬兼有夷人
沙人儂人等獷悍性成聚眾滋擾擬於城廂內外並各村寨責成
鄉保廠丁鑪戶責成各長土司所屬及沙儂夷人皆責成頭目各
將所管界址門戶立簿按月稟送該管官認真稽查如有結盟爲
匪等事立即指拏各等語所議尙屬周妥惟言之非艱行之惟艱
若徒議立章程不能實力通辦或任令吏胥徇庇甚至藉端騷擾
致使良法美意日久視爲具文是除弊而轉以滋弊著該督撫督

飭地方官卽按照見定章程認真辦理其燒香結拜等匪一經查獲立即從嚴懲辦勿令釀成巨案○己酉夏至祭地於方澤

○以王懿德爲福建巡撫調吳式芬爲陝西布政使以呂佺孫爲

貴州布政使蘇敬衡爲四川按察使前福建按察使○庚戌諭內閣戶部

奏請停工程等語道光二十年曾奉諭旨一切工程暫行停止

十餘年來中外臣工自當欽遵辦理第恐閱時既久工作漸增又

滋浮濫之弊著仍欽遵聖訓凡京外各衙門除壇廟緊要

工程仍隨時興修外其餘一切工程均著暫行停止以示限制○

辛亥上御箭亭閱大員子弟步射○周天爵勞崇光向榮奏溫

大貨五由懷集竄廣甯各文武跟蹤追剿另有股匪四百餘人由

廣甯周分岡竄懷集縣屬南坪村距詩洞二十餘里賀縣縣丞任

光祖帶福勇四百名在彼防守經署懷集縣知縣李萱飛諭團練

與任光祖會勦千總楊鶴超等管帶兵壯二百名馳往詩洞分途堵截十二日由詩洞往南坪迎面攔擊該匪晨餐未完兵練直前衝撲斃賊百餘查有廣東德慶州匪首葉亞十李亞鵠二人亦被擊斃餘匪仍由廣甯及德慶州界竄去又奏宣化縣地方有另股賊匪竄入卽帶兵壯勦捕該匪由宣化縣朗墟竄金陵墟至那龍村離南甯府城百三十里署南甯府知府鄒嶧杰於四月初九日趕至離那龍村四十里該匪分股奪船渡河擄掠十三日該署府密令投誠之張家祥更名張國樑者帶勇往擊轟斃多名十四日張國樑率勇坐快艇由小河潛赴村左另派數十人沿河接應該匪等出拒放礮擊傷壯勇數人張國樑已至村左槍礮轟擊村內房屋瓦片紛墜賊堅匿在內次日派勇攜帶火罐繞村後攀登山嶺由高擲下餘仍水陸分進前後夾攻十五日該匪逃往思恩府

武緣縣地方被官軍攔住該署府尾追兵至斃賊百餘因山嶺險峻恐有埋伏遂卽紮住旋聞顏品瑤有竄廣西之信該署府仍回南甯仍飭令督率壯勇會合圍捕不得因匪已出境稍存玩視見在會匪竄踞象州中坪一帶數十村莊五月初八初九等日兵勇列營進逼賊縮歸新寨依山之地其欲逃入舊巢無疑茲飭四面進兵設卽逃敗亦必歸羅淶峒殄滅止在旬月閒此時西南一帶縱有零匪亦必勦盡此股方能再滅凌十八劉八溫大賀五等匪至太平思甯有賊之處德惠兩鎮多係分派將弁追勦不能得力惟賴張國樑及各鄉勇東西奔馳力圖掃蕩又奏博白劉八股匪前經擊敗追至距香山二十餘里之樟嘉村四月十三日攻進香山該匪竄東館墟分住竹根坡十四日壯練攻進竹根坡該匪退踞東館墟知府游長齡等逼近賊巢飭壯勇督同投誠之黃錦泗

等分隊繼進黃錦泗率隊先入賊巢殺賊二十餘人劉八胞弟劉九亦被殲斃賊仍踞東館墟我軍回屯竹根坡十七日該府紮營樟嘉村俟潮州兵勇到後再行合剿又奏前奉旨飭查左江鎮總兵德亮是否得力查德亮見在太平府屬督剿疊次殲賊多名是該鎮於剿捕賊匪尙能表率 上諭內閣周天爵勞崇光向榮奏剿捕懷集南坪賊匪一摺另片奏追剿劉八股匪及進剿會匪凌十八等各情形此次剿捕南坪另股賊匪雖獲勝仗惟溫大貨五何名科等皆著名兇賊已由懷集竄回廣甯近據徐廣縉等奏報剿辦廣甯賊匪亦未將首逆殲擒若非東西兩省合力痛剿不分畛域何以迅掃賊氛至劉八凌十八等兩股賊匪奔竄兩粵交界地方雖屢經擊散旋復嘯聚總因兩省帶兵各員不能併力兜圍以致此拏彼竄良民受其蹂躪遭其裹脅何時還定安集朕心實

深焦念見在賽尙阿業已馳抵軍營著卽嚴飭在事文武激勵兵勇迅速殲擒並著徐廣縉葉名琛督飭帶兵大員於肇慶高廉各屬交界處所一體會剿務使著名兇匪悉數就擒儻該文武等有推諉退縮等情卽著據實嚴參朕必執法從事斷不能稍爲寬宥也○諭軍機大臣等粵西一省羣盜如毛必須大兵會合兜剿方能淨絕根株惟用兵之道謀定後動此時賊匪自以竄踞象州之會匪爲最大一股其凌十八劉八溫大貨五等股奔竄兩粵交界地方此擎彼竄蔓延日久疊據兩省奏報均不免互相推諉所謂師克在和者安在耶賽尙阿計已馳抵軍營審度地勢人材全局在胸見在剿辦當以何股爲先何股爲次或合兵一處聚而殲旃或分兵協剿同時並舉務當權其輕重緩急相機布置各股著名賊首擒獲甚少必應殲厥渠魁乃可散其黨與先剿後撫庶無後

患其應如何運籌決勝朕亦不爲遙制見踞象州中坪一帶匪徒勢已窮蹙思竄是否仍歸羅淥岡舊巢正可乘機設誘設伏截其奔竄之路以冀一鼓殲擒至凌十八劉八等股竄回雋州合浦等處經西省文武兵練跟蹤追剿何以東省全無接應著卽飛飭廣東文武於交界處所合力圍捕毋令坐失事機至竄入懷集縣之賊匪既經該署縣李萱約會湖南官兵合擊何以帶兵遊擊韓世禧忽然捲旆而返是否恣意刁難抑係聞賊逼近有心退縮著一併查明嚴參又據周天爵等片奏查明左江鎮總兵德亮疊次殲擒賊匪尙能表率等語著仍遵前旨與惠慶一併確查具奏周天爵等此次摺內何以烏蘭泰並未列銜殊不可解豈軍營情形竟不與聞耶朕覽廣西前後奏到各摺所陳情形未免急遽無序賞罰恐難平允是以諭令周天爵來京茲據鄒鳴鶴奏報五月內可

於全州接印任事賽尙阿抵軍營後定能相助爲理沈靜致遠謀
勇兼施諒該大臣必能契合朕心迅奏偉績也周天爵所調文武
各官及紳士兵勇人等著畱心察看斟酌用之周天爵等摺片均
著鈔給閱看將此由五百里諭知賽尙阿並諭令巴清德達洪阿
烏蘭泰鄒鳴鶴向榮知之○王子諭內閣陸建瀛奏審辦販私人
犯請飭由運司勘詳等語淮南鹺務新章初定緝私最爲緊要揚
州府屬地方私梟出沒各州縣拏獲人犯往往因距省較遠諱飾
消弭致梟徒罔知儆懼當此整頓鹽務之時自應酌量變通翼收
實效嗣後揚州府屬八州縣鹽犯問擬軍流以上罪名者著由該
府徑解鹽運司勘詳該督分別覈辦其罪僅擬徒者著由臬司會
同運司覈轉如有夥梟拒捕殺傷重犯仍著該督提省審辦總期
有犯必懲毋任倖脫以儆梟頑而肅鹺政○命工部右侍郎彭蘊

章在軍機大臣上行走○癸丑諭軍機大臣等前任太常寺卿唐鑑奏廣西用兵請飭設立民堡收恤難民一摺粵匪未靖疊經言事者以堅壁清野上陳並據大學士卓秉恬錄呈龔景瀚三議周天爵亦曾奏及保甲衛民之法均降旨令該大臣體察情形飭令地方官籌辦唐鑑曾任廣西知府於該省情形熟悉所論尤爲親切勦匪以安民爲亟若民有險可守自不至被賊裹脅民氣益固則賊勢益孤勦辦更易得力鄒鳴鶴新任巡撫地方是其專責見已諭令督率司道實力辦理卽需費一二十萬亦非所惜想該大臣與該撫必能善體朕意妥爲經畫也原摺鈔給閱看將此由四百里諭令賽尙阿知之○諭廣西賊匪肆行節經降旨飭令通省居民舉行團練互相保衛並寄發大學士卓秉恬錄進龔景瀚所著堅壁清野各議周天爵亦曾奏及保甲等法茲復據前任太常

寺唐鑑奏陳設立民堡收恤難民二條該員曾任廣西知府熟悉該省情形所論頗爲親切著鄒鳴鶴按照摺內所擬設堡事宜酌量地勢與賊近遠如當賊之衝及嘗被蹂躪等處尤宜妥速辦理善用古法參酌時宜督同藩司勞崇光臬司姚瑩責成各道府剴諭紳士人等分投妥辦不可有名無實尤不可稍涉擾累至收恤難民酌給口糧勿使流而從賊最爲目前要務果能嚴飭所屬實力遵行辦理經費需用一二十萬兩爲吾民謀久安之計朕亦何所靳惜總期民氣益固賊黨自孤眾志成城小醜無難撲滅卽將來善後規模亦不外是矣原摺著鈔給閱看將此諭知鄒鳴鶴並傳諭勞崇光姚瑩知之○甲寅諭內閣訥爾經額奏遵查河道隄埝並籌議辦理一摺天津府靜海縣屬西鄉泊水以引河爲去路自嘉慶年間勘明挑挖具有成案自應仍照舊章導水入子牙正

河使西鄉不至被淹北鄉各村亦無虞波及其蓮花淀南土埝既於河道無礙且非近年私築卽無庸平毀以符舊制著照所議章程嗣後修隄挑河及啟閉各事宜責成獨流鎮巡檢就近管理由靜海縣稽查督辦以弭水患而息訟端○諭戶部議覆裕泰等奏閩商勻代課銀不准停徵並帶輸銀兩准其酌展一半已依議行矣另片奏閩省商疲引滯請飭該督撫另議章程實力整頓等語各省鹽務滯銷固由銀價昂貴亦因緝私不力浮費不裁以致商力疲困閩省籤商之弊與河東同而閩省情形尤甚該督撫等既稱商疲引滯力保全綱卽應窮其致弊之源急圖挽救乃僅請停減例課而於緝私裁費之緊要關鍵並未議及雖復請停請減徒使帑項無著竟於大局何裨從前雲南課歸井竈至今暢銷淮北改行票鹽之後變滯爲暢近來淮南仿照辦理亦有成效可見積

弊雖深得人則理若但爲乞恩之請不籌窮變通久之方年復一年何所底止著新任閩浙總督季芝昌福建巡撫王懿德於到任後察看情形悉心講求通盤籌畫其應如何除弊興利變通整飭之處妥議章程據實具奏○乙卯 上詣 大高殿祈雨○諭內閣薩迎阿奏審明通事誘倡供詞並通事供出承審各員非刑倡供及司道誘供故入人罪各情一摺並分別定擬開單請旨所有擬請革職發往新疆之甘肅署蘭州府慶陽府知府步際桐候補知府桂昌署靜甯州知州趙桂芳候補知縣姜熊平羅縣知縣緄評靖遠縣知縣李志學署平涼縣知縣劉元績署碾伯縣知縣尹泗調任鎮迪道西甯道文桂涼州俄專嶺遊擊冷震東擬請革職發往軍臺之署按察使前任鞏秦階道朱其鎮均著卽行革職交該署督派員解交刑部朱其鎮見經告病如已啟程回籍著咨行

沿途各督撫派員解京其擬請革職發往新疆之調任河南布政使甘肅布政使張集馨著革職交潘鐸派員解交刑部一併歸案質訊覈議具奏並著該署督將案內已革通事馬圖乜福康潤及兵丁馬仲元林治康伏元通丁馬明春蘇祿馬得成王廷美一併押解刑部質訊將所擬罪名覆覈辦理所請嚴議議處之前署督標中軍副將見題補平羅營參將珠克登西甯北川營都司石長興肅州安西營都司辛殿甲西甯鎮標右營千總趙國棟鎮海營千總米兆魁丹噶爾同知彭衍堂西甯府知府鈴祥均著刑部於定案時分別覈擬請旨至訊係無辜奏請省釋之番族洛朶等十七名著刑部定案時奏明辦理○諭軍機大臣等薩迎阿奏審擬通事誘徇供詞並分別議擬非刑徇供之承審各員及誘供之司道開單呈覽已明降諭旨將張集馨等先行革職同通事馬圖等

解送刑部歸案覈辦矣另片奏覆查琦善原奏各條披覽均悉惟已革蒙古章京格窩先經琦善奏革頂翎嚴審追定案摺內並未聲敘見尙畱省監禁雖查與雍沙番案無涉其與柯柯烏蘇賊匪送信一節是否恃無質證狡飾不承仍著薩迎阿確切查明辦理前次交查各件著一併確查具奏將此諭令知之○浙江巡撫常大澣奏於甯波府城四門分設義學督同道府恭將 欽定四言韻文頒發各學報可○是月展緩廣東佛岡三廳縣及肇慶高州廉州三府所屬州縣上年未完額賦蠲免奉天遼陽等九廳州縣節年民欠應徵銀米並兵丁站丁借支口糧

六月丙辰朔諭內閣據兵部奏參衛弁失察水手滋事畏葸不擊漕督並不據實嚴參一摺上年長淮四等幫糧船水手王大漢等糾眾訛索旗丁偏給溜子並偏令空運千總王振彪蓋用鈐記復

將重運千總惠慶堯肆行辱罵該千總等於水手種種不法不卽嚴拏懲辦畏葸無能咎有應得該漕督何得因其會同獲犯遽請免議惠慶堯王振彪均著革職以示懲儆漕運總督楊殿邦著交部議處○周天爵烏蘭泰向榮奏匪踞象州中坪百丈新寨一帶鉛彈稀少至有用銅錢者臣等往返籌商惟列營徐徐進逼使賊不能乘隙竄出而犄角之勢成臣烏蘭泰統帶貴州鎮遠鎮古州鎮威甯鎮三營官兵共四千名於五月初八日自羅秀前進至獨鰲山南梁山村駐紮距中坪四五里許臣榮是日由桐木至界嶺駐紮扼守中坪之東總兵經文岱與知府張敬修由林村至寺村駐紮皆不出十里內外各營隨帶兵練環峙其旁初九日賊於東南山頭聚集四五百人搖旗出隊其後布滿山谷有賊數千直逼臣烏蘭泰三鎮大營而各處營盤尙未整齊不能救援臣烏蘭泰

當卽派隊分路轟擊斃賊多名該匪敗退初十日據探報有賊數

千渡河直撲威甯鎮營盤

臣

烏蘭泰督兵排隊出營該匪分十數

股約四五百人礮子如雨

臣

烏蘭泰嚴飭官兵仍舊站隊一面督

兵施放大礮火箭打中賊巢望樓賊向下走我兵分投迎擊

臣

烏

蘭泰督兵奮勇攻殺將西南山頭賊擊敗復由獨鼇山腳過橋直

撲賊隊自寅至巳戰至四時之久將匪隊全行擊散惟西南山頭

有賊數十參將馬善寶等率眾大呼策馬竟渡止之不及逾河里

許該匪已敗者忽然站住西南山谷間突出數百人橫攔歸路馬

善寶等陣亡

臣

烏蘭泰催眾力救將賊擊退俟厚集大兵再圖掃

蕩又奏初十日知府張敬修等由廟旺至寺村進剿斃騎馬僞中

軍先鋒一名十一日

臣

天爵馳赴寺村會剿張敬修等已由橋東

山口進兵時賊分三股來拒該員等亦分三路攻擊斃匪百數十

人十二日張敬修等由寺村迤東之長烈嶺分投進剿賊自東南來當催福勇迎擊賊又分兩股布滿山嶺於是福勇及張釗之勇先行接仗東勇繼之開礮迎擊賊墜下厓谷間已而西股賊匪沿山來者英勇一見大呼輒走東澗西澗之伏賊遽擁而至官軍短兵相接戮斃數十人始行敗去又有股匪從後繞至經文岱張敬修大戰良久賊眾散走殺斃二百餘惟儘西面一股英勇無故喊走鎖道目睹此狀知英勇隊中必有賊匪隨傳令整隊而下追兵勇自東來兜圍匪不能支又斃三百餘名見在晝夜規畫仍待新兵大集再行偏進 上諭逆匪竄踞象州經烏蘭泰督兵攻剿大獲勝仗烏蘭泰調度有方殊堪嘉尚著交部從優議敘所有在事出力文武著賽尙阿查明保奏候朕施恩其陣亡之貴州撫標中軍參將馬善寶鎮遠鎮遊擊博勒果布威甯鎮中軍遊擊劉定泰

等雖因乘勝輕進究屬奮勇捐軀均著交部賜卹○諭軍機大臣等此次進剿英勇隊中顯有賊匪夥黨假名暗伏詭譎伎倆殊堪痛恨兩軍對壘不能不藉資壯勇以助兵力若謂盡屬可疑則防不勝防必難期其用命若謂概屬可信又恐墮其奸謀應如何密查嚴防俾爲我用不爲賊用之處務當於招募之初責成管帶之人悉心體察勿使奸徒涸跡方爲妥善將此由五百里諭知賽尙阿並諭令巴清德達洪阿烏蘭泰周天爵鄒鳴鶴向榮知之○調蔣霽遠爲河南布政使以郭夢齡爲山西布政使沈兆澐爲河南按察使

由江南江安糧道遷

○以攻剿金田獲勝賞總兵官經文岱等花翎

餘升敘有差○丁巳雨○諭軍機大臣等賽尙阿奏馳抵長沙統

籌剿辦事宜一摺據稱粵西賊匪以象州爲最鉅此股剿捕得力各股自成破竹之勢並酌擬激勵鄉團解散脅從先行刊發告示

及慎重糧餉等情所論均合機宜該大臣已馳抵軍營各省大兵雲集象州之賊固應厚集兵勇大隊合圍迅速剿滅其南甯太平一帶及懷集奔竄各匪亦應分派大員帶兵前往督剿見在巴清德達洪阿亦次第到粵各省鎮將足資調遣著該大臣審度地勢人材某處應派何路官兵何人管帶可期得力某處官兵應派何人接應務使聲勢聯絡凡賊巢險隘誘伏處所必須偵探的確庶可一鼓殲擒使各股賊匪不能互相救援方爲萬全之策至糧臺之設尤關緊要該大臣籌畫情形與疊次諭旨正相符合卽著選派弁兵嚴密保衛並分置各處俾利轉輸不可稍存大意朕觀烏蘭泰頗有謀略紀律向榮亦久歷戎行必能與巴清德達洪阿等助卿宣力同心共濟迅奏膚功也周天爵前已有旨諭令來京毋庸畱於江華防堵其所募皖勇二百名應如何分布管帶酌量辦

理前調安徽兵一千名既屬輒弱又沿途不甚安靜恐難得力著隨時查察分營布置其統帶將弁不能約束卽著查明參奏將此由四百里諭令知之○戊午諭內閣工部錢法堂奏請分撥銅斤以資鼓鑄等語工部寶源局見存銅斤不敷鼓鑄在途各運壘經嚴催尙未據報抵何處自應先事豫籌著戶部錢法堂於業經提到之湖北銅六十萬斤內撥交工部二十萬斤以資接濟其奏提未到之江蘇湖南存銅共四十四萬三千斤俟解到時亦著照向來滇銅定額分撥工局三分之一嗣後戶部如再提他省銅斤並著照此劃分辦理以昭平允○己未 上詣 大高殿謝雨○甲子 萬壽節免朝賀○丙寅烏蘭泰奏臣四月二十九日馳赴羅秀將泰定三所帶官兵挑選千名分給器械教以陣式傳示條規紀律以期殺賊立功威甯鎮重綸統帶兵一千名署古州鎮李瑞

統帶八百名五月初九日接周天爵咨會檄各路官兵剋日圍剿
初八日准向榮知會已由桐木進紮臣卽會商李瑞並知會威甯
營帶兵官佟攀梅等於初九日拔營逼近賊巢並選兵練千名整
隊先進至獨鰲山南梁山村一帶相度形勢其地一片平陽東臨
大河河東中坪仁義等村俱在目前瞥見中坪村北第一山頭賊
匪望樓有人搖旗臣卽將大兵調過山南並令古州威甯二營兵
各分六隊排列時由仁義村竄出賊匪三四十人被我兵用擡槍
擊斃二名餘匪竄回其望樓下賊匪已聚集六七百人用大礮向
我軍施放隨令旗營官兵開礮打中望樓賊卽紛紛潰散因恐該
匪狡猾全軍未敢遽撤至晚始整隊回營其威甯營紮在西邊山
頭古州營在中間初十日有賊數千渡河而來臣令佟攀梅往前
迎敵大股賊匪已至橋南開礮我軍因得地勢由高臨下槍礮火

箭齊發該匪前隊旣斃後隊又進由稻田奔獨轆山西角直撲我營我兵用槍齊打該匪前隊倒斃後隊回奔臣見其勢已倒卽令

各伍整隊過橋追殺大獲全勝西南高山打礮之賊經威甯營轟擊潰散適有由山上逃下十數賊奔梁山村經我兵擊斃僅贖七賊復奔上西山梁離威甯營不遠乃威甯礮兵因無長器械在手退回隊內賊見礮兵已退直撲威甯大隊大隊之兵亦退回營盤賊乘勢追撲以致該營之兵全行棄營奔潰千兵不敵七賊贖出情理之外其南山頭之賊亦卽撲來用威甯營之礮直攻臣營臣入營防守見東南面似可保住卽赴西北面照料適旗營兵並鎮遠兵大聲吶喊首先上山富珠隆阿帶威甯兵隨同擁上該匪棄營南竄我兵復奪回威甯營是日由寅至午勝而誤敗敗而復勝轉戰四時之久共陣亡大小官十五員額外馬步兵丁二百四十

二名廣州駐防旗兵七名受傷官兵四十四名臣布置不善咎無可辭惟有請旨重治臣罪至威甯鎮官兵怯懦敗退該鎮重綸因病未在軍營其帶兵官署副將佟攀梅署參將慶祿等不能約束據實奏明請旨治罪又奏五月十一日向榮前軍移進都金嶺周天爵由寺村進得勝十二日復戰未利至晚兵勇俱退回象州其寺村一路俱空接周天爵信十二日寺村之戰英勇內有奸細呼眾先逃兵勇不能支持連夜回到象州屬臣察看形勢如獨鼇山勢不可守卽移紮羅秀防堵俟續調大兵到齊再行會剿因思圍剿之局已散獨鼇距中坪甚近孤軍臨敵舉目皆賊其地可戰不可守故於十六日率兵回羅秀舊營向榮仍駐界嶺與羅秀相距六七里聲援相應再向榮久歷戎行勇敢有爲屢著戰功惟此次統帶楚兵始而攻剿流匪屢捷因之或有大意又因向繼雄不知

避嫌以致楚兵藉口因周天爵精神不及未能設法調度向榮知楚兵心離自挽無術故有諉卸之處然久歷戎行熟悉戰陣見在軍營鎮將各員均有不及向榮者賽尙阿到時必能激勵勸勉或更易其兵則向榮必知感奮仍可立功又奏向榮之子五品廕生向繼雄在營效力不能避嫌跡近干預又因向榮保伊子花翎致眾心不服楚兵藉端挾制是周天爵所奏向榮曲徇其子致失人心不爲無因至周天爵札飭秦定三周鳳岐堵追接應該二人延不用命一節查賊匪在武宣東鄉秦定三周鳳岐共駐一營在東面堵禦與營帶東勇之見署右江道張敬修營盤相連四月十五日夜間賊匪竄出未能堵禦十六日追賊至官橋打仗已勝因兵無鍋帳復回十七日又在二塘紮營未能尾追延不用命亦屬實情惟周天爵參秦定三周鳳岐未參張敬修人心亦有不服至統

帶楚兵之副將博春和春係向榮隨營將官臣未到武宣以前聞
本年三月初二日與賊打仗不利周天爵責秦定三不前後訪知
秦定三並無退縮之處卽言向榮推卸周天爵與向榮向榮與秦
定三均似因之有隙周天爵爲人居心本直惟性強耳輒精神不
及其子周光岳從中干預致失人心上諭內閣此次我兵逼近
賊巢奮勇勦殺逆匪已大受懲創雖小有挫衄究屬罪不掩功且
烏蘭泰尙能轉敗爲勝所請治罪之處著毋庸議其前經交部優
敘亦著毋庸注銷烏蘭泰據實陳奏具見不欺若能迅速立功仍
當加以懋賞惟管帶威甯鎮兵之署參將佟攀梅署參將慶祿始
則屢催迎敵延不出營迨賊匪撲營輒卽退回致令全勝之後復
有挫折實屬罪無可逭佟攀梅慶祿著卽革職拏問交賽尙阿嚴
訊定擬具奏此外失機之將弁兵丁等一併查明懲辦嗣後帶兵

將弁務各恪遵號令奮勇圖功毋再玩誤致蹈重罪懍之○諭軍機大臣等據烏蘭泰奏遵查鎮將不和情形又縷陳連日獲勝後因誤敗自請治罪各一摺及另片所陳各情形並將獨鼇山形勢繪圖呈覽披閱均悉此次進兵獨鼇山南連獲勝仗賊眾轟斃潰散下山僅賸七賊復上山梁直撲威甯大營該營官兵計有千人何以不敢出營抵禦反全行奔潰致有挫折實出情理之外著賽尚阿卽查明該營弁兵究係何人首先奔潰按律懲辦以肅軍令威甯鎮總兵重綸是否實係因病並未在營抑係有心規避確查具奏再向榮所帶湖南弁兵初到粵時頗覺勇往是否因向繼雄濫得保舉因而解體抑係該弁兵等恃勝驕悍不聽號令旣不得力卽畱營亦恐誤事見在湖南防堵緊要亦須兵力著賽尚阿到營察看是否可以裁撤或令仍回本省防堵向榮籍隸四川見調

可資得力其威甯鎮潰散之兵甚不足恃應如何安插裁撤之處亦著酌量辦理烏蘭泰所論覈實保舉一節頗有所見見在周天爵業經來京軍營賞罰事權歸一嗣後保舉參劾想賽尙阿必能權衡功過允協羣情無苛無濫也至烏蘭泰覆奏查明軍營主將不和緣由及湖南副將博春和春不能稟請追賊及張敬修獨未被參等情業據咨明該大臣著與前此疊降諭旨飭令查覈功過各件一併確查據實具奏將此由五百里諭知賽尙阿並諭令烏蘭泰知之○丁卯雲貴總督吳文鎔奏報到任日期得旨汝之有謀有猷濟之以張亮基能持能斷則滇省之吏治民風自可漸臻淳樸朕將拭目待之此旨與張亮基同看○戊辰諭內閣呂恆安徐宗幹奏臺灣澎湖地方偶遇風災委員查勘籌款辦理一摺據

稱澎湖廳上年晚收歉薄本年三月復猝被風霾以致雜糧枯萎
民情倍形拮据業經該鎮道會商於道庫提銀二千兩又撥銀三
千兩委員解往該廳查明分別撫恤仍著察看情形或應加賑或
應緩徵錢糧卽行據實具奏並詳明該督撫覈實辦理以副朕軫
念災區至意○庚午諭軍機大臣等寄諭欽差大臣大學士賽尙
阿據鄒鳴鶴奏南太各郡賊氛未熄見飭藩司分駐勦辦並添兵
防守省城一摺廣西勦匪以韋政洪秀泉等大股爲最急而南太
一帶餘匪未淨且地方寫遠深恐鞭長莫及轉致蔓延該撫鄒鳴
鶴擬請飭派藩司勞崇光分駐南甯太平扼要處並咨商該大臣
遴委勇幹將官帶兵會同馳往勦辦諒已酌量調遣矣見在續調
各路官兵均可到粵如何分派合擊前已有旨諭令熟籌辦理左
江鎮德亮勦賊是否得力仍著隨時察看據實具奏其各股匪徒

除象州會匪外見在尚有幾股每股約計若干人及賊首姓名均著查明開單奏聞該撫所稱林一昌顏品瑤等股及養利州左州龍州等處均有游匪忽聚忽散務當嚴飭分投剿捕迅速撲滅勿任合成大股其省城防守各屬團練及保護糧餉各事宜據鄒鳴鶴次第籌辦該大臣到粵後擬駐何處及如何通盤籌畫之處諒有奏報在途矣將此由四百里諭令知之○諭鄒鳴鶴奏南太各郡賊氛未熄請飭藩司分駐剿辦並防守省城情形一摺粵西剿匪自以象州大股爲最要此外游匪如林聚散靡定亦應遴派大員分兵督剿俾不至愈聚愈多據稱勞崇光前駐梧州剿滅首匪鄧立奇等著有成效著卽飭令該藩司移駐南甯太平一帶會督該處在事文武協力剿捕毋令蔓延其梧州一帶仍應派員防剿著該撫會商賽尙阿妥籌布置至省城防守尤關緊要經該紳士

龍啟瑞朱琦等辦理團練眾志成城殊堪嘉尚但恐兵力尙形單薄著卽於全州等營酌調兵丁並添雇壯勇協力防守毋稍疏忽另片奏嚴正基深明團練之法見在會同藩臬兩司及候補道周煦徵辦理糧臺候擬定章程卽飭嚴正基前往各郡督辦團練籌畫頗合機宜均著照所議辦理將此由四百里諭令知之○辛未諭內閣戶部奏遵撥銀兩解赴湖北一摺見在湖北辦理過境兵差需用較繁所有部撥江海關稅及江西河南山東監銀共十五萬兩著各該省迅卽按數委員解赴湖北以資支放至兩淮欠解湖北省已酉庚戌兩綱匣費銀兩著兩江總督速飭運司按照奏定新章先行提解並將節年未解匣費銀兩分別籌解毋再延宕○癸酉諭內閣常大瀄奏遵議保甲章程開單呈覽一摺浙江山海交錯舟居陸處遷徙靡常編查保甲誠爲要務據奏見從省城

分段守望已臻嚴密村落因地制宜一律互相策應戶口實填更換隨時抽查以及身行寺觀船戶等處悉行編列更爲選舉保長務用端人禁絕賭娼勿滋盜藪各條所議尙爲周妥惟發令之初易於見效若不持以實力久且視爲具文全在該大吏認真督率尤須申戒屬員示以勸懲嚴查胥役毋得藉此擾及閭閻使民間共知保甲之設所以衛民樂於從事則法可久而不廢自不至陽奉陰違始勤終怠也○甲戌諭內閣徐廣縉葉名琛奏勦辦廣甯匪徒三獲勝仗生擒賊首一摺廣西賀縣股匪竄回東境由四會至廣甯高要等縣界經該督等飭令文武員弁勦捕四月二十九日追至大播墟候補縣丞劉鎮潮州府司獄牢考祥率潮勇攻破賊壘擒斃多名該匪分股突出黃岡協守備鍾慶瑞會同廣甯縣知縣程兆桂署督標守備薩國亮三面合擊斃賊甚多賊遂分竄

開建之雲塘封川之長塘署督標水師營千總盧威揚肇慶協把
總何振標江口汛把總李得祿於五月初九日由漁潯直擣賊巢
轟斃七十餘賊鍾慶瑞薩國亮劉鎮牢考祥分帶兵勇於十三日
進剿轟斃一百三十六名生擒二十四名奪獲銅鐵礮三十二位
及大旗槍矛多件餘匪潰散其逆首溫大貨五一名復經前任肇
慶府知府蔡振武懸賞購綫督同各員弁於十四日在廣甯之梅
子尖拏獲解省審辦此時肇慶一帶漸就廓清夥匪曾亞涓等勢
已窮蹙不難悉數殄滅著該督等督飭文武盡力搜捕勿任竄逸
所有出力員弁著查明確實分別保奏○諭軍機大臣等據徐廣
縉等奏剿辦廣甯匪徒連獲勝仗並追剿東省各股零匪及覆查
廣西大股會匪情形又奏參升任總兵託故遷延各一摺已分別
明降諭旨將趙如勝以都司降補交賽尙阿差委並諭令徐廣縉

等督飭文武嚴密堵剿矣該大臣已抵軍營所有該處賊股地勢情形自必全局在胸妥爲布置象州大股逆匪固應厚集兵力合併圍剿其南甯太平一帶各股零匪紛如蝟集勢甚猖獗亦應多派弁兵併力掃除前據鄒鳴鶴奏請飭藩司勞崇光分駐該處並咨商該大臣遴委將官會同剿辦諒已酌量調遣降補都司趙如勝前在廣東剿捕尙屬得力見交該大臣差委著卽酌量調撥或飭赴南甯太平一帶與高廉接壤扼要處所隨同剿賊察其能否感奮據實具奏賊首劉八及凌十八兩股並何名科一股雖經廣東文武疊次擒剿而渠魁總未就獲餘黨仍復分竄若不急合東西兩省兵力四面兜捕滋蔓伊于胡底著該大臣隨時知照徐廣縉等嚴飭高廉一帶文武不分畛域與廣西派出之文武員弁兩路夾擊以期及早撲滅淨絕根株其賊首溫大貨五一名已據廣

東拏獲解省審辦惟夥匪曾亞渴等黨與尙多已諭令徐廣縉等嚴密搜捕西省文武亦應一體堵緝勿令竄逸是爲至要將此由四百里諭令知之○諭徐廣縉馳奏勦辦廣甯匪徒生擒要匪連獲勝仗各情逆匪溫大貨五業經擒獲其夥匪曾亞渴尙有數百之眾難保不因首匪就擒鋌而走險至劉八凌十八及何名科各股賊犯雖據疊次追拏而逆首尙未擒獲勦辦不容鬆懈見在周天爵已飭令來京賽尙阿等業已馳抵軍營事權歸一該督兼轄兩省尤當不分畛域合力兜拏庶可速圖蒞事以副朕望至所奏蔡振武拏獲逆匪溫大貨五一名著卽查明據實保奏將此由四百里諭令知之○乙亥賽尙阿奏_臣於靈川縣途次據向榮咨報逆匪屯集中坪仁義等村探得有調百丈等處賊匪助戰之信卽令綏靖鎮李伏等帶兵千七百名委員許炳東等帶勇於五月十

三日渡河攻剿署參將成安於上流河口攻賊之伏先行開仗各兵壯依次涉水而進該匪卽從嶺後擁出官兵奮勇接戰自辰至午斃賊百數十名李伏當先搶上山梁又斃匪數十人復有賊十數股擁來把總熊士貴手刃數賊殺入賊隊登時陣亡李伏撤過小河該匪亦卽折回賊巢水田環繞小河阻滯進退不易督飭官兵嚴加防堵知府陳瑞芝帶潮勇千名趕到探賊欲逃竄飛咨烏蘭泰及各鎮嚴密堵截二十六日寅刻匪隊四五百人擁至古磨黃岱嶺上屯聚卽令陳瑞芝等伏於下官村後未入流謝繼超督投誠壯勇數百首先誘敵賊蠶擁而來壯勇誘至伏所陳瑞芝等督潮勇擁出施放排槍先鋒騎馬賊三人立時槍斃餘匪驚潰追至小河口該匪已涉水奔回古磨嶺上分三股一奔架村一伏寺葉村一越苦瓜嶺欲鈔攻官兵營盤餘盡占嶺上助勢向榮卽將

楚粵兵勇分五路齊進潮勇仁勇由徭山腳進擊匪股二千餘人擁至架村將民房焚燒經捷勇由左邊山腳橫衝攻擊副將和春帶楚兵潮勇仁勇搶過架村環攻寺葉村斃賊數千人將僞右軍先鋒方標殲斃其苦瓜嶺一股經遊擊瞿騰龍成林奮力堵剿該匪見中路敗走亦卽縮回惟要村一股千餘人鳴角舞牌由村外衝出望大營而來兵勇併力環攻卽時潰敗我兵追至河岸亦鳴金收軍查該逆鹽糧空匱思欲拌死衝突經兵勇踊躍用命一日之間三戰三勝俟大兵雲集似更無難得手仍當加意堵截以絕其奔竄就食之路見經向榮札飭象州武宣桂平平南各文武官兵於水路要隘一體嚴防並禁止往來船隻以防偷渡臣仍授以機宜俾在事文武併力堵剿其陣亡之湖南鎮筵鎮左營把總熊士貴請飭部照例賜卹又奏

臣

六月初四日抵桂林達洪阿巴清

德先後趕到查各省官兵見有受傷受病及怯懦不堪復用者擬確查釐剔挑揀裁撤期一兵得一兵之用卽各處練勇招集烏合有首鼠兩端居心叵測者詳悉甄覈分別妥辦尤當申明紀律嚴定賞罰庶期一律得力至粵西情形除桂林一屬尙稱完善此外各府羣盜如毛各股土匪多者數千少者數百會匪之兇悍甚於土匪會匪之黨與亦更多於土匪周天爵屢言賊勢窮蹙欲以坐困斃之而武宣大股由金田而東鄉而廟旺寺村偪近象州諸將領各懷意見屢失機宜自五月以來經烏蘭泰向榮等少挫兇鋒見聞該匪有欲竄回東鄉之說自當一面密訪一面嚴行堵截儻有可乘之機斷不敢一誤再誤總使賊之所到無可掠之鹽糧則匪徒已有困斃之勢再以大兵分投勦捕當可陸續奏功至湖南會匪接應之說沿途密訪實無確據可憑不使過事張皇轉致別

滋事端又奏查林士傳帶兵勇二千名赴賀縣會同肇慶協副將
齋清阿剿辦匪徒三月初五日齋清阿在里松接仗官兵先勝追
至山澗賊縱火鈔後官兵失利該道在龍津橋駐紮離賀縣百四
十里其賀縣壯勇六百名臨打仗時復調回四百名是此役先勝
後敗實由林士傳貽誤無疑應請旨卽行革職賀縣知縣甯域辦
理防堵尙識機宜林士傳平素官聲尙協輿論擬請將該二員畱
於軍營差遣以觀後效又奏臣抵廣西省城會晤鄒鳴鶴兩天爵
詢知平樂柳州潯州鬱林太平鎮安泗城等處盜匪多經兵勇剿
滅擊散或逃東省去而復來散而復聚股數眾多其由金田竄象
州之會匪韋政洪秀泉等尙在中坪百丈新寨一帶盤踞先經向
榮帶湖南兵在賊之東北界嶺紮營烏蘭秦同秦定三周鳳岐帶
貴州兵在賊之西北羅秀札營候補知府劉繼祖帶領壯勇及張

釗水勇在賊之西運江紮駐皆嚴堵其竄往平樂桂平之路而南路之大樟西南路之寺村均係要地臣札飭總兵經文岱署右江道張敬修前往寺村舉人韋仁元帶徭勇前往大樟堵此兩路庶爲周密臣查會匪人眾善戰官兵先到者已形疲懈新調之兵未到會集尙須旬日見在六月盛暑南方炎溼非進兵之時應令各營照前堅堵儻賊出巢竄撲則相機擊退不令竄出一面多購間諜解散黨與計誘賊首自相攜貳俟新兵雲集八面進攻爲一鼓殲除之計此外各股盜匪皆有兵勇堵剿如凌十八劉八等在廣東省之化州西省之博白一帶往來竄越見有署臬司楊彤如總兵李能臣會帶兵勇剿辦惟南甯太平等府匪股眾多亦當籌辦象州大股尤爲緊要向榮所帶湖南兵多疲乏擬令挑選精壯堪戰者畱營俟新調兵到前往抽換桂林省城存兵無多經署藩司

吳鼎昌率同在籍翰林院侍講龍啟瑞御史朱琦等辦理團練最爲周密

臣

一面會同鄒鳴鶴督飭各府州縣設法鼓勵本地紳士

實行團練既以保衛地方且使賊無所掠前次李星沅駐紮柳州係以通省賊勢眾盛柳州居中可以四面策應今各路賊勢忽聚忽散鬱林一帶有楊彤如等分辦惟象州會匪喫重在省城之南相去僅四百里柳州反在賊後擬卽暫駐省城控制俟各省新兵齊到剋期進剿或遣派巴清德達洪阿分帶前往或

臣

親往督辦之處再行具奏

上諭內閣本日據賽尙阿奏六月初四日馳抵

桂林巴清德達洪阿亦先後馳到見在相機剿辦並繪呈廣西全省地圖單開賊首名數所陳覈汰兵勇申明紀律多購閒諜解散賊黨嚴斷接濟實行團練使賊無可掠之食無可竄之路籌畫均合機宜該大臣等經朕特簡畀以重任到粵之始卽能通籌全局

條理秩然深慰朕念著發去黃馬褂二件大荷包一對小荷包一對火鑷一箇賞給賽尙阿祇領黃馬褂二件分賞巴清德達洪阿祇領粵西地近瘴鄉時當炎暑見值用兵之際朕念軍士勤勞馳驅用命睠懷南服宵旰難忘惟望迅掃賊氛俾吾民咸登衽席不特該大臣等渥膺懋賞卽文武官弁紳士壯勇亦得共荷恩施用酬勞勩朕實有厚望焉○諭軍機大臣等據賽尙阿馳奏到粵籌剿賊匪布置一切事宜並提鎮進剿逆匪三獲勝仗及遵查李伏密訪湖南會匪寬籌軍餉各摺片並開列股匪清單繪呈全省地圖披覽均悉廣西羣盜如毛自用兵以來雖屢獲勝仗時有斬擒總未大加懲創該大臣見抵軍營節制各將事權歸一所陳廣西匪股地勢情形瞭如指掌據稱先行甄汰怯懦之兵烏合之勇而後嚴定賞罰痛剿力攻使賊匪無可掠之鹽糧無可竄之隘路並

堅堵賊巢解散黨與實行團練布置均合機宜象州大股逆匪距省不遠固當嚴防北竄但既聞有欲竄回東鄉之說更當嚴飭文武四面堵截斷不可再令竄回舊巢復致滋蔓此次連獲勝仗楚兵似尙可用著該大臣體察情形其尙堪驅策者畱在軍營其餘或令回守省城或撤回湖南防堵酌量辦理前任道員林士傳既經查明貽誤屬實著卽革職知縣甯域均著畱於軍營差遣仍查明能否得力據實具奏該大臣暫駐省城控制全局糧臺諸務鄒鳴鶴已籌辦周妥巴清德達洪阿烏蘭泰向榮等皆能奮勇圖功堪資分任應如何分剿合擊度地相機以操勝算想該大臣必能契合朕意埽蕩賊氛迅奏膚功也將此由五百里諭知賽尙阿並諭令巴清德達洪阿烏蘭泰鄒鳴鶴向榮知之○諭據賽尙阿馳奏密訪湖南會匪情形等語見在廣西賊氛未靖湖南境地毗連

若會匪潛相勾引所關非細著程喬采卽行馳赴湖南督同文武大員於要隘處所加意防堵仍不動聲色訪查該省會匪實在情形妥爲防備總期弭患未然斷不可稍涉張皇致滋事端至賽尙阿歷陳湖南吏治之廢弛民情之浮動自係確有聞見該督兼轄兩省本有應行查辦之責著卽按照所奏各情亟圖整頓其應如何察吏安民激勵化導之處諒該督必能酌量情形隨時奏聞辦理也原片著鈔給閱看將此由五百里諭令知之○諭賽尙阿奏請寬籌軍餉以備撥用一摺前經特發內帑銀一百萬兩又經戶部籌撥銀一百萬兩嗣據江南奏撥鹽庫銀六十萬兩昨復據廣東奏撥粵海關稅銀二十萬兩均解赴廣西軍營應用計已可敷支發惟糧餉至要必當寬爲儲備以免臨事周章著徐廣縉葉名琛仍於關稅項下按季扣存連前次已經撥解之二十萬兩統籌

備銀一百萬兩聽候發餉尙阿咨撥委解毋稍遲誤再前有旨令該督撫等察看兩粵交界何處情形最爲緊要如須葉名琛親往駐紮督辦卽一面奏聞一面啟程可也將此由五百里諭令知之○丙子諭軍機大臣等據奕山布彥奏查明佐領富珠爾泰並未向俄羅斯屬其代尋馬匹亦無收馬給與回頭之事其巴桑失馬一案亦與該國來文數目不符並將近來收哈薩克馬租等情詳細陳明見在俄羅斯遣使已抵伊犁會議通商此事最關緊要該將軍等給與信稟甚屬妥協仍著遵照節次諭旨熟商妥議總期經久無弊毋致貽患將來是爲至要將此諭令知之○丁丑御史張澧翰奏河南省近年盜匪肆橫南陽府屬尤甚聞捻首喬建德匪黨二千餘人盤踞泌陽縣角子山攔路搶劫擄人勒贖本年二月以來道途梗塞四月間泌陽捻匪數百人一日搶掠十數家殺

斃事主七人五月初四日南召縣有擒首李大李二率匪千餘至山內陳姓家姦淫搶劫將事主開膛碎屍該縣畏憚不辦陳姓因鄰封裕州知州姚慶溥長於緝捕奔赴求救該州率領兵壯數百往捕與李大李二等倚山對壘半日之久互有殺傷李大被獲唐縣擒匪千餘肆行焚搶幾至圍城鄧州桐柏新野等處亦有匪徒結黨或數十人數百人不等大者放火殺人小者聚賭酗酒居民受其荼毒多徙去鄉里見任知府葉法人本貪鄙不理公事卽如撫臣潘鐸參該府誤拏喬建德一節此上年六月初旬事也該撫訪聞飭拏而葉法遷延數月竟以姓名相同之皮匠解省塞責經該撫提省申飭迄今年餘僅獲夥犯二名諱飾疲玩已可概見該撫如此案既經查明何以事隔一年始將該管文武分別撤任摘頂顯因賊勢猖獗恐別經發覺始以案中一端從輕參奏地方糜

燭情形並未詳細入告設法籌剿該處毗連湖北爲楚豫門戶蔓延句結燎原之勢已成賊巢甚多大約不外內鄉淅川各山內及鄧州之林家壩孟家樓魏家集等處其遠者則湖北均州房縣諸山中及光化之瀟河口襄陽之樊城鎮皆通逃藪也請飭撫臣通盤籌畫具奏一面知會湖北令其選派明幹文武於交界各屬一體堵剿以期迅速蕩平不致釀成巨患 上諭軍機大臣等有人奏河南捻匪猖獗請嚴飭籌剿一摺該撫潘鐸身膺疆寄於匪徒肆擾州縣因循諱飾何以毫無覺察該撫前參葉法誤拏捻首何以事隔一年之久始將該管文武分別奏參而捻首迄未就獲又未將該匪徒橫肆情形及見在籌畫事宜詳細陳明豈於民生疾苦竟置不問耶著潘鐸明白回奏南陽毗連湖北爲楚豫門戶若不設法偵緝勢必滋蔓難圖著該撫卽飭南陽鎮總兵圖塔布南

汝光道鄭敦謹督同文武上緊搜捕務令悉數弋獲毋使一名漏網南陽一府如此他郡亦恐不免並著嚴飭各地方官不分畛域實力查拏其畏葸諱飾如南召縣知縣者此等劣員卽行查明從嚴參辦儻仍疲玩致匪徒肆行勾結釀成事端朕惟知執法從事恐潘鐸不能當此重咎也又另片奏南陽府屬鄧州掘墓各案開單呈覽該撫本日奏到已故提督齊慎墳冢被賊發掘一案卽係南陽所屬新野地方可見單內所稱並非無據何以鄧州東鄉十餘里內掘墓各案如此之多並未具奏豈因案關已故大員始行奏參其餘各案僅以咨結了事抑任令該地方官遷延諱飾匿不詳報著按照單內所開各案詳細查明一併據實具奏原摺片並單均著鈔給閱看將此諭令知之○諭寄諭兩江總督陸建瀛湖廣總督程喬采等有人奏河南捻匪肆橫南陽府屬爲尤甚匪徒

結黨數十人或數百人不等賊巢甚多不外內鄉縣淅川廳各山內及鄧州之林家壩孟家樓魏家集溝龍關李官橋等處並湖北均州房縣諸山中及光化縣之潦河口襄陽縣之樊城鎮皆爲逋逃淵藪等語河南捻匪橫行總由地方文武不能實力查拏所致南陽一府如此他郡亦必不免若不及早撲滅必致滋蔓難圖所有湖北安徽江蘇等省均與河南毗連著各該督撫一體飭屬於交界處所不分畛域合力堵緝毋任此拏彼竄其湖北省均州等處見有賊巢更當嚴密搜查認真懲辦以期殄絕根株勿貽後患儻辦理不能妥速或致釀成事端惟該督撫是問將此各諭令知之○諭據德興等奏遵議裁撤察漢城駐防蒙古兵丁及蒙古郡王恭木楚克集克默特懇請暫居永安城外住牧未便率行議准一招該郡王等暫居永安城外業已二年有餘前薩迎阿奏擬准

再一二年由青海大臣察看如生計充裕卽飭令回牧原係從權辦理惟是一二年後儻該郡王等生計仍然拮据未能撤回原牧又將如何辦理其駐防兵丁全數裁撤則蒙古與漢兵聲氣不能相通守望難以相助儻被野番滋擾該蒙古益覺進退維谷亦恐未爲盡善著薩迎阿會同哈勒吉那通盤籌畫將如何防禦野番安插蒙古之處再行詳細妥議具奏勿貽後患所有德興會同理藩院議奏原摺著鈔給閱看將此諭令知之○己卯諭軍機大臣等前因河南南陽府捻匪橫行當經降旨令陸建瀛等於交界處所合力堵拏矣茲據王植奏壽州匪犯程六麻孜等結捻橫行訛搶鄉民經地方官督率勇役查拏膽敢拒捕脫逃復據懷遠縣詳報程六麻孜糾眾搶劫燒毀張學清等房屋合肥縣匪犯高四八孜亦有搶劫傷人之案等語見在壽春鎮兵分調廣西該匪等乘

隙滋擾若不及早剪除必致養癰貽患著陸建瀛蔣文慶體察情形及早籌辦勿令漏網儻所委文武各員查辦不力卽著指名嚴參毋稍姑息再前據賽尙阿奏調派安徽兵一千名前赴廣西沿途不甚安靜且聞兵亦輟弱可見平日訓練紀律並不認真著該督撫等嚴飭鎮將實力整頓新任壽春鎮總兵德勝其性情才力是否堪膺重鎮並著陸建瀛蔣文慶隨時察看據實具奏將此各諭令知之○庚辰諭軍機大臣等步軍統領衙門奏江西南豐縣耆民聯名控案已明降諭旨交王植馳驛前往審辦矣此案南豐縣耆民謝恆周等聯名五十餘人遣抱告呈控紳棍鄒希孟等包漕需索糾眾倡官並生員魯宗顯等繳還衣頂意圖挾制前曾赴都察院控訴咨回本省將抱告夏富希押縣一年有餘不爲究辦及巡撫臬司偏袒各款案關糾眾包漕牽涉大吏虛實亟應徹底

根究是否該知縣辦理不善撫臬大吏有無袒護實據紳棍如何
侵漁控詞有無捏飾著王植秉公查辦悉心研究以期水落石出
毋稍含混原摺呈均著鈔給閱看將此諭令知之○辛巳諭內閣
琦善奏番賊復出搶掠一摺另片奏永昌縣追捕賊匪情形等語
據稱西甯鎮總兵薩炳阿稟報哈拉庫圖爾有番賊一百餘人騎
馬持械盤踞下峽口地方當經該鎮挑派弁兵馳往堵捕又南川
王溝爾等莊有番賊搶掠牲畜該鎮等派令署守備汪永楨追捕
斃賊十餘名復經該鎮帶兵督捕餘賊始行逃竄署守備趙國棟
被傷陣亡兵丁亦有傷亡其撒口冰溝地方搶掠牲畜賊匪經永
昌縣知縣郭雲青會營追捕殺斃騎馬賊三名奪回被搶羸馬並
奪獲賊馬三匹及鳥槍刀矛帳房鉛彈多件兵勇均未受傷該處
番賊甫經勦辦又復四出搶掠甚至拒捕傷及官兵實屬目無法

紀著薩迎阿嚴飭鎮將跟蹤剿捕不得以賊匪遠颺稍疏防範如有託故遷延不肯實力查拏者卽著嚴參懲辦署守備趙國棟交部照例賜卹○是月免福建廈門龍溪等九廳州縣民欠銀穀直隸通州等處五十三州縣民欠旗租及應徵銀穀並滄靜海等八州縣及豐財等三場竈丁積欠額課浙江仁和等處五十一州縣衛所帶徵銀米免犂阿齊烏蘇民回各戶借欠籽種貸直隸任邱雄二縣修理橋隄銀